

DOMENIE VII «VIE PAL AN»

Jutoris pe Liturgjie

Domenie ai 19 di Fevrâr dal 2017

Ancje in cheste domenie la liturgjie e continue a tignînus dongje dal Signôr midiant dal discors des beatitudinis.

Amait i vuestris nemîs e preait par chei che us perseguitin: il Signôr al à une peraule superiôr, che e va al di là des nestris justiciis, pretesis e resonaments. Nus mene par trois rimpinîts, ma al à reson lui che al à tante plui sapience e umanitât di nô.

Come peraule, dut inte liturgjie di cheste domenie al è facil e ancje un frut lu capîs. Il probleme al è un altri: che la nestre religjon fate su misure e tirarà fûr mil scusis e motivazions par no meti in pratiche. Però o vin di dî cu la antifone di jentrade: I cjantarai al Signôr che mi à judât.

Antifone di jentrade

Sal 12,6

Intal to boncûr, Signôr, o ai vude fede;
che si indalegri il gno cûr te tô salvece.
I cjantarai al Signôr che mi à judât.

Colete

Diu onipotent, danus la gracie
di meditâ simpri ce ch'al è just,
par podê fâ, cu lis peraulis e cu lis voris, lis robis che ti plasin.
Pal nestri Signôr Gjesù Crist to Fi, ch'al è Diu
e cun te al vîf e al regne dutune cul Spirtu Sant,
par ducj i secui dai secui.

PRIME LETURE

Lv 19,1-2.17-18

Tu amarâs il to prossim come te in persone.

Certs esegjetis a spieghin che chest comant dal Signôr tu amarâs il to prossim fat ai fîs dal to popul (di Israel) al vignarà superât cuant che tal Gnûf Testament no varin plui un popul specific parcè che il mont intîr al deventarà une sole int. Al è ce che in zornade di vuê si clame globalizazion e cuntune brute peraule: uniformitât sot un unic paron mondiâl. Ma noaltris o restin un Gjesù di Nazaret; Gjesù nol à mai rinunçât al so popul, si è simpri sintût un ebreu.

Chel tu amarâs il to prossim come te in persone nol comence dal navigâ lontan e fûr de proprie realtât ma dal fermâsi al vicin, dongje di cjase, tal to paîs e cui fîs dal to popul che al vîf culi in Friûl.

Dal libri dal Levitic

Il Signôr i fevelà a Mosè e i disè: «Dîsii a dute la comunitât dai fîs di Israel: Viodê di jessi sants, parcè che jo, il Signôr, il vuestri Diu, o soi sant.

No sta vê asse tal to cûr cuintri di to fradi; fâsii al to prossim une corezion su la muse, cussì no tu ti cjaminâr di un pecjât par vie di lui. No sta cirî svindics e no sta tignî rusins cuintri dai fîs dal to popul, ma tu amarâs il to prossim come te in persone. Jo o soi il Signôr».

Peraule di Diu.

SALM RESPONSORIÂL

dal Salm 102

Il salm al complet, lu cjatìn tal Salteri: salm n. 103.

Al è une cjante di ricognossince al Signôr pal so bon cûr e par ducj i beneficis che a son vignûts de sô sante man. Fortunâts nô, se o sintìn che chestis peraulis a son veris ancje pe nestre vite.

R. Il Signôr al è bon e grant intal amôr.

Se cjantât: Il cjant dai salms responsoriâi, p. 57.

Benedis, anime mê, il Signôr,
dut ce ch'al è in me il so non sant al benedissi.
Benedis, anime mê, il Signôr,
e no sta lassâ in dismentie nissun dai siei plasês. **R.**

Lui ti à perdonadis dutis lis tôs colpis,
ti à vuarît di ducj i tiei mâi;
al à tirade fûr de buse la tô vite,
ti à incoronât di boncûr e di gracie. **R.**

Bon e di boncûr al è il Signôr,
pegri tal inrabiâsi e grant tal perdonâ lis colpis;
no nus à tratâts daûr dai nestrîs pecjâts;
no nus à paiâts daûr des nestrîs colpis. **R.**

Come ch'al è lontan dal amont il jevâ dal soreli,
cussì al à slontanât di nô lis nestrîs colpis.
Come che un pari al à dûl dai siei fîs,
cussì il Signôr al à dûl di chei che lu rispîtin. **R.**

SECONDE LETURE

1 Cor 3,16-23

Dut al è vuestri, ma vualtris o sês di Crist e Crist al è di Diu.

Come che spes al sucêt cheste seconde leture e va par cont so. L'Apuestul al continue a fâ il confront fra la sapience dal mont e chê di Diu e nus vise che: la sapience di chest mont e je matetât denant di Diu. La vere sapience e je te cognossince di Crist, parcè che in lui si è spandude cence misure sore di nô ogni sorte di sapience e di inteligjence (cfr. Ef 1, 8). A chest pont, la conclusion e je evidente: Vualtris però o sês di Crist e Crist al è di Diu.

De prime letare di san Pauli apuestul ai Corints

Fradis, no savêso ch'ò sês templi di Diu e che il Spirt di Diu al è a stâ in vualtris? Se un al bute jù il templi di Diu, Diu lu butarà jù lui. Parcè che al è sant il templi di Diu, ch'ò sês vualtris. Nissun nol à di fâsi inclusions. Se fra di vualtris cualchidun al crôt di jessi sapient in chest mont, che si fasi mat par diventâ sapient. Parcè che la sapience di chest mont e je matetât denant di Diu. Di fat al è scrit: "Lui al brinche i sapients midiant de lôr furbetât". E ancje: "Il Signôr al sa che i progjets dai sapients no son nuie".

Duncje nissun nol à di poiâ la sô glorie sore dai oms; parcè che dut al è vuestri: Pauli, Apol, Chefa, il mont, la vite, la muart, lis robis ch'a son, lis robis ch'a vignaran, dut al è vuestri. Vualtris però o sês di Crist e Crist al è di Diu.

Peraule di Diu.

CJANT AL VANZELI

cf. Zn 6,63.68

R. Aleluia, aleluia.

Lis tôs peraulis, Signôr, a son spirt e vite.
Dome tu tu âs peraulis di vite eterne.

R. Aleluia.

VANZELI

Mt 5,38-48

O podìn sostegnî cence teme di sbalgjâ che un dai miôr coments a chest vanzeli di vuê e je la vite concrete dal Mahatma Gandhi (1869-1948). Lui al è rivât a unî popul-ultims-culture-

economie-politiche-liberazion-dignitât- tun struc unic; i à insegnadi al so popul a vivi dut chest te discipline interiôr de veretât, de spiritualitât, de no-violence e dal perdon.

Il vanzeli di vuê al è veramentri unic. I paragon che il Signôr al presente a son dome par dînus: tes tôs resons o tuarts, tai sbalgjos fats o tal mâl ricevût tu reste fî di Diu che al fâs plovî sui juscj come sui injuscj; impare di to fradi Gjesù a jentrâ pe puarte strete dal amôr cence condizions.

La pazience-resistence-fadie de no-violence inte veretât nus ricompensarà e nus menarà a jessi perfets come che al è perfet il Pari vuestri ch'al è tai cîi.

Dal vanzeli seont Matieu

In chês volte, Gjesù al disè ai siei dissepui: «O vês sintût che al è stât dit: “Voli par voli e dint par dint”. Jo us dîs invezit di no resisti al trist; anzit se un ti pete de bande gjestre de muse, voltii ancje chês altre. A un ch'al vûl strissinâti in tribunâl par puartâti vie la vieste, dai ancje la manteline; se un al vûl obleâti a fâ une mie, va cun lui par dôs miis. Se un ti domande, dai; se un ti domande alc ad imprest, no sta voltâi lis spalis.

O vês sintût che al è stât dit: “Tu amarâs il to prossim e tu odearâs il to nemî”. Jo us dîs invezit: amait i vuestris nemîs e preait par chei che us perseguitin, par ch'o sedis fîs dal Pari vuestri ch'al è tai cîi, ch'al fâs jevâ il so soreli sui triscj come sui bogns e al fâs plovî sui juscj come sui injuscj. Di fat se ur volês ben dome a di chei che us vuelin ben, ce ricompense varessiso di vê? No fasino compagn ancje i publicans? E se o saludais dome i vuestris fradis, ce fasêso di speciâl? No fasino cussì ancje i paians? Vualtris duncje o varês di jessi perfets come che al è perfet il Pari vuestri ch'al è tai cîi.

Peraule dal Signôr.

Su lis ufiertis

Celebrant i tiei misteris cul rivuart ch'a mertin,
ti prein, Signôr,
ch'al zovi pe nestre salvece
ce ch'o ufrin in onôr de tô maiestât.
Par Crist nestri Signôr.

Antifone a la comunion

Sal 9,2-3

O vœi contâ dutis lis robonis che tu âs fatis.
O vœi jessi content e plen di ligrie,
o vœi cjantâ il to non, Altissim.

O ben:

Zn 11,27

Signôr, jo o ai crodût che tu tu sês il Crist,
il Fi dal Diu vîf, chel ch'al à di vignî tal mont.

Daspò de comunion

Diu onipotent, danus par plasê di rivâ a chês salvece
che midiant di chescj misteris
o vin vude la capare.
Par Crist nestri Signôr

* * *

Riflession di pre Antoni Beline: Perfets come il Pari

And è stâts di stramps o di mâl informâts o di mâl inclapâts che a àn dit e scrit che la religion cristiane i met al om dome confins e stralencs e vincui e lu oblee di une bande e di chês altre, i inibîs di gjoldi, i cjonce la libertât e i compromet la sô plenece. Fasint ben i conts, i è plui di damp che no

di util e al è dibot plui ce pierdi a cognossile che no ce vuadagnâ. Pa la cuâl, par podê vivi in plene libertât, no si à di vê nissune religion e chê cristiane mancul ancjemò.

Poben, se cualchidun le pense cussì, che al lei cun calme...

Vanzeli par un popul, an A, p. 140

* * *

Cjants

- Cjants des domeniiis Vie pal an.

* * *

Bisugne rinunziâ a la violence; al semee che la violence e puarti vantaçs, ma no je vere; invezit, i damps che e prodûs si ju tocje cun man e a durin tal timp.

Mahatma Gandhi

* * *

* *I cjants, salms e cjantadis a vegnin ripuartâts cu la numerazion dal libri: Hosanna, Cjants e preieris dal popul furlan, Ed. Glesie Furlane, 2012.*

* *Il cjant dai salms resposoriâi, Ed. Glesie Furlane, 2012.*

* *Il libri des riflessions sul Vanzeli al è: pre Antoni Beline, Vanzeli par un popul, an A, Ed. Arti Grafiche Friulane.*

* *Par domandâ chescj libris scrivêt a info@glesiefurlane.org*